

# Gálatas

*Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sěntsabiamná Jesucristbeñe ošbuáchiyëngbiana, chě Galacia luaroca ošbuachiyëngcá enefjuanëngbiana. Jesucristo y Běngbe Bětsá, chě Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Běngbe Bětsá ndocna entšá tbonjanichmó atše chatbe ichmonacá jabuábuayanama. Atše y chě ínŷenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná.

<sup>3</sup> Atše sěntseimpadana Běngbe Bětsá Běngbe Taitá y Běngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama.

<sup>4</sup> Cristo chabe derecho vida jtsobomñama cachcá tojanonŷá y tojanóbana, běngbe bacna soyënguentšana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Běngbe Bětsá, Běngbe Taitá endmëná yojanboščá.

<sup>5</sup> Nŷetscanga nŷetsca tescama Běngbe Bětsá chamotsatschuaná. Chca chaotsemna.

*Nýe canýe ndegombre buayenana soyënga Cristbiana endmëna*

<sup>6</sup> Atšbe ainanoca inýetsá šontsebiona, er nda nanjouena, tšëngaftanga nýe baseftayshinýe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínýengbe buayenana soye jouenama, y chë ínýenga jtsichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inýe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguëntše, ba ndegombre soyënga jtsejuánama, inýe soyënga jacjayama. <sup>8</sup> Nderado bënga o canýe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiana ¡Bëngbe Bëtsá chaoma infiernoca becá chaosufrima! <sup>9</sup> Tempo ya chca sënjánayana; mora cachiñe šcutëtayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiana chaoma infiernoca puerte chaosufrima!

<sup>10</sup> Atše chca stjayana ora, ¿tšëngaftanga cmojtsinýana atše soyënga stsama entšanga oyejuayënga átšeftaca chamotsemnama? Ndoñe

chca quenátsmëna. Atše sëndboše ndayá Bëngbe Bëtsá átseftaca oyejuayá chaotsemnana. Entšanga oyejuayënga chamotsemnana, atše cabá soyënga stsamëse, atše ya ndoñe Cristbe canÿe oservená stsemna.

*Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnana*

<sup>11</sup> Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiyiná quem luarentša entšangbe juabnentšana ndoñe yondóbocanama. <sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema.

<sup>14</sup> Atše inÿe judiënga cach atšcá uata bomnëngbiana más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsamama ntšamo bëngbe bëts taitanga básenga jabuátambama monjanamancá. <sup>15</sup> Pero Bëngbe Bëtsá atšbe tšabiama yojanjuabná, y chíyeca, atše cabá ndonÿna ora, canÿe bëts soyama cha šojanbocacá. <sup>16</sup> Y cha tojánbošena ora, šonjaninÿinÿé ntšamo ndegombre chabe Uaquiñá

yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënama chašobuayenama; <sup>17</sup> y Jerusalenoye cach ndoñe chiyataná chë atšbiamá más natsana Jesucristbe ichmónënga imojamnëngaftaca jencuëntama. Chamna, cachora Arabia uabaina luaroye sentsanoñe, y chentšana Damasco bëts pueblöye sëntaná.

<sup>18</sup> Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca jencuëntama, y cháftaca nÿe uta semana sënjëftsemna. <sup>19</sup> Y ndocna chë Jesucristbe inÿe ichmónënga chiyáisananÿe; nÿe Santiago aíñe, Bëngbe Utabnabe catšata. <sup>20</sup> Bëngbe Bëtsá šontsonÿá, ntšamo tšëngaftanga cbontsëtsëtsnacá ndegombre bëtsemnana.

<sup>21</sup> Jerusalenocana sënjëftsanbocnentsana, Siria y Cilicia luarëngoye sënjána. <sup>22</sup> Pero chë tempo, chë Jesucristbeñe ošbuáchiyënga Judea luariñe bomínÿeca ndoñe quešmënjatanábuatma. <sup>23</sup> Nÿe ínÿëngbioye imojtsayaunana: “Nda tempo bënga puerte chamotsesufrínama enjanamá, mora entšanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondëtsošbuáchema ca” —chënga imojtsichamo. <sup>24</sup> Y entšanga Bëngbe Bëtsá imojtsatschuanaye, ndayá cha atšbiajana tojanmama.

*Chë inye ichmónënga tmojánayana Pablo aíñe tšabá yojtsama ca*

<sup>1</sup> Jerusalenoye sënjána orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetse. <sup>2</sup> Choye sënjána, choye jama šojamnama Bëngbe Bëtsá šonjaninÿanyëyeca. Atse nÿe chë Jesucristbeñe ošbuáchiyëngbiamá uámanënga imojamnëngaftaca sënjanencuentá, ínÿengaftaca ndoñe; y chë tšabe noticiëngama chë ndoñe judiëngbeñe sëndabuayiynama chënga sënjanacuntá. Chca sënjanma atse jtsetatsëmbuama, ntšamo tijanma y sënjëftsamcá ndoñe nÿe bonamente yonjamnama. <sup>3</sup> Pero chënga tmonjánayana atse aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentse tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinÿnama. <sup>4</sup> Chca tonjanopasá, masque ínÿenga monjánboše Tito base bobachtema chë más delicadentse tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatsëmbcá, mo chë ošbuáchiyëngbiamá bacna soyënga jamama cuafseitëmena cuenta. Chënga tmojánabo jtsetatsëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánÿiñe mo canÿacá jtsemnëse. Chënga chca

tmojanma, er chënga imojtsanboše jamana, bënga chë judiëngbe leyëngaca nyets tempo mandánënga chamotsiyenama. <sup>5</sup> Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga beca fsënjánboše tšëngaftanga nyets tempo Jesucristbe ndegombre tšabe noticiënga chašmotsóbomñama.

<sup>6</sup> Pero chë ndëmuanyëngbiama entsanga monjánichamo chë uánatsanënga imojamna ca (ndayá chënga tempo imojamna atšbiamana ndoñe quenatámana; Bëngbe Bëtsabiamana nyetscanga cachcá monduámana), chëngna tondaye chešmatanbuayená, ntšamo tempo tijanmama inyetsá chaimama. <sup>7</sup> Masna, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchema, ntšamo judiënga jábuayenama cachcá Pédrëbioye tbojanëntšabuachecá. <sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiamana jábuayenama, ntšamo cachá Pédrëbioye chabe ichmoná tbojanbemcá, judiënga chabiamana jábuayenama.

<sup>9</sup> Santiago, Pedro y Juan, chë ošbuachiyënguentsá uánatsanënga, atše canye bëts trabajo chaitsebomnama Bëngbe Bëtsá tojanmama tmonjántatšëmbona ora, cucuatše sontanatsataye atše y Bernabëbioye, jinýinýiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiynayama trabajo

jamama, y chëngna judiëngbeñe. <sup>10</sup> Chënga nÿe šonjanaimpádaye chë ošbuáchiyënga ndbomnjémënga Jerusalenoquëngbiama jtsenójuabnayama; y atše bëtscá sëntsama chënga jujabuáchama.

*Pablo Antioquioca Pédrëbiana tojánayana cha ndoñe tšabá tojanma ca*

<sup>11</sup> Pero Pedro Antioquía bëts puebløye tonjánabo ora, chabe delante sënjánayana cha ndoñe tšabá tojanma ca, er ntšamo enjanamcá ndoñe tšabá quenjatsmëna. <sup>12</sup> Mëntšá tonjanopasá: Santiago básefta entšanga Antioquiøye tojanichmó, pero chënga cabá choca ndáshajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnama yojánamna ca tmojánayanënga, chabiana muanjájuaboyama yojtsauatja causa. <sup>13</sup> Chë inÿe judiënga ošbuachiyëngnaca tmojanontšé amana cachcá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsonÿayëse, chëngcá yojtsama, jtsamëse ntšamo cha yojántatšëmbo chca jamama ndoñe ibonjamncá. <sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninÿe

ora, Pédrëbioye nyetsca ošbuáchiyëngbe delante sënjaniyana: “Aca canye judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema*

<sup>15</sup> Bënga judiënga fsëndmëna, bëngbe bëtsëtsanga judiënga monjámnyeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsásmëna. <sup>16</sup> Y bënga mondëtatšëmbo, canye entšá Jesucristbeñe tojtsošbuáchema, Bëngbe Bëtsá jamana cha chabe bominyiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominyiñe tšábenga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canye entšá chabe bominyiñe tšabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtscá mondënguá, Bëngbe Bëtsá chaomama bënga chabe bominyiñe tšábenga chamotsemnana, bënga Crísoftaca cányiñe mo canyácá jtsemnëse, chábeñe imošbuáchema. Chca mondošbuaché, bënga chë bacna soyëngama



perdonánēnga chamotsemnama. Pero inye entšanga jtsichámuana bēnga bacna soyēnga amēnga imomna ca, ntšamo chē Moisesbe leyīñe iuayancá ndoñe montsama causa. ¿Y chca, Cristo bacna soye amēnga šuabiamná ca nántsayana? ¡Ndoñe, ndegombre ndoñe! <sup>18</sup> Atše, ntšamo Bēngbe Bētsá šojaninñecá, chē šojtsemna jájbanama soyēnga, cachiñe jajuaboyama y jamama stētontšese, mo chē Moisesbe ley jtsocumplínana perdonánēnga jtsemnama, atše stsemna mo nda ndayá cachá tojtsendbema y cachiñe tojtšejebuanacá; y ndegombre, atše stsemna canya ntšamo ndoñe tšabá yondmēncá amá. <sup>19</sup> Chē judiēngbe leyēngaca atše sēndētatsšēmo, ntšamo chē leyēnguiñe iuayancá stsamēse, Bēngbe Bētsá ndoñe yochanjama atše chabe bominiñe tšabia chaitsemnama; y chca, atše jtsemnana mo obanacá chē castígoca, er chē leyentša mandēnga stsamēse, ndoñe quetsátobena atsbocaná jtsemnama. Chē léyeca ndoñe más mandaná ntsemnama jtsebošēse, atše cachcá chē ley sēnjanonjá, Jesucristbeñe jtsošbuáchiyama; y chca, atše chaitsobena jtsiyenana Bēngbe Bētsá jtseservénēse. Atše Crísoftaca cánñiñe mo canyáca sēndmēnayeca, Cristo cruciñe tojanóbana ora enjamna mo átšnaca cuafjobancá; <sup>20</sup> y mora entsemna mo nye atše ya ndoñe cuafsiyencá, Cristo becá vida atšbe ainaniñe entsebómnayeca. Y ntšamo mora atše vida sēntsebomncá, entsemna atše chē Bēngbe Bētsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonjá

y atšbe tšabiamama tojanóbana. <sup>21</sup> Atše ndoñe quetsatábotena ntšamo Bëngbe Bëtsá entsangbe tšabiamama juabna yobomncá. Nderado Bëngbe Bëtsá tojama canye entsá chabe bominyiñe tšabia chaotsemnama, ntšamo chë leyiñe jamama yomna ca iuayancá cha tojtsamama, as Cristo nye tondayama matënjanóbana.

### 3

#### *Leyjtsobedecénese o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entsanga, yapa ndenójuabnayeñga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiñá, Jesucristo cruciñe tojanóbanama. <sup>2</sup> Atše sëntseboše nye canye soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? <sup>3</sup> ¿Ndáyeca tša ndenójuabnayeñga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nye entsangbe juabnëngaca jtsiyenëse? <sup>4</sup> ¿Nýetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espíritu tšëngaftangbe ainaniñe cháuamashënguama tojanma ora, y tšëngaftangbeñe bëts soyënga

chaopasama tojama ora, ¿ndáyeca chca nanjama? ¿Tšëngaftanga ntšamo chë leyíñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominyíñe tšabia yojamna ca.” <sup>7</sup> Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahámbentšana entšangcá, cachcá ošbuáchiyana bëtsebomnama, chë chábertšana ndegombre entšangbiamama más. <sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominyíñe tšábenga chamotsemnana, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acbeyeca, atše chanjama nyetsca quem luarentša entšanga tšabe bendicionënga chamotsebomnama ca.” <sup>9</sup> Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiamama tšabe soyënga tojanmcá.

<sup>10</sup> Chë Bëngbe Bëtsá chabe bominyíñe tšábenga yochjábiamama ca juabnayënga, ntšamo

leyiñe jamama yomna ca iuayancá lempe tmojtsobedecénama, chënga nyëts tempo jtsiyenana jtsetatšëmbëse Bëngbe Bëtsá nyëtsca tescama chënga yochjácastigayama. Er Bëngbe Bëtsabe uabemana palabrënguiñe mëntsá endayana: “Bëngbe Bëtsá jayanana nyëtsca tescama castigo chaotsebomna ca, nda nyëts tempo ndoñe tontsama nyëtsca mandënga ntšamo chë leyënguiñe iuabemancá ca.” <sup>11</sup> Ndegombre, puerte tšabá entsinÿinÿena, Bëngbe Bëtsá ndoñe yochanjama ndocná chabe bominÿiñe tšabia chaotsemnana, ntšamo chë leyiñe jamama ibomna ca iuayancá tojtsobedecënëse. Chca ndegombre endmëna, er Bëngbe Bëtsabe uabemana palabrënguiñe mëntsá endayana: “Nyë ndabiama Bëngbe Bëtsá tojama chabe bominÿiñe tšabia chaotsemnana, cha Bëngbe Bëtsábeñe betsošbuáchema, cha ndegombre chë nyëtsca tescama yomna tšabe vida echántsebomna ca.”

<sup>12</sup> Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguiñe endayancá: “Nda tojtsama nyëtsca mandënga ntšamo chë leyënguiñe endayancá, tšabe vida echántsebomna, nyëts tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyëtsca tescama castigánënga ndoñe chamondëtsemnana, ntšamo chë leyiñe iuayancá ndoñe tmontsama causa. Ntšamo Bëngbe

Bëtsabe uabemana palabrénguiñe endayancá: “Nÿetsca tescama castigo chaotsebomna, nda canÿe niñësiñe tmojajonÿá chaóbanama cha ca.”  
<sup>14</sup> Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámbioye tbojanšbuachenacá, ndoñe judiëngnaca chamotsebomnama, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháúamashëngo jtsemádayama, ntšamo Bëngbe Bëtsá tojanašebuachenacá.

*Ndocna ley quenátobena Bëngbe Bëtsabe šbuachenana soye jatrócama*

<sup>15</sup> Jesucristbeyeca catšátanga, chë ndayá sëntsichamcá endmëna ntšamo nÿets tempo entšángbeñe endbetsopasancá. Uta entšata tbojenoyeuná canÿe trato jénbemama, y ntšamo tbojenšbuachenacá chaotsinÿnama chatbe uabaina tsbuanáchañe tbojuábemëse, ndocná inÿa más ntsobenana jayanana ntšamo tbojentratacá ndoñe yontsoserverna ca; y inÿe soyënga chiñe jacjayama cach ndoñe. <sup>16</sup> Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiamama, y chabe entšanguentšana canÿabiámnaca. Y Bëngbe Bëtsabe uabemana palabrénguiñe ndoñe quenátayana: “chabe entšanguentšëngbiámnaca ca”, mo Bëngbe Bëtsá ba entšangbiamama cuaftsichamcá; sinó mëntšá endayana: “acbe entšanguentšana cánÿabiamama ca”. Y chca entsayana, nÿe canÿe entšá ca; y cha endmëna Cristo. <sup>17</sup> Atše ndayá mëntšá cbontsëtsëtsná: Natsana, Bëngbe Bëtsá

Abrahánofraca canye trato tojánbema, y tbojaniyana “áiñe ca”, ntšamo tbojanšbuachenacá jamama. Chentsana canta patse y unga bnětsana uatěse, Běngbe Bětsá Moisesbe cucuatšiñe chě leyěnga tbojanántšaboshjona; chíyeca, chě leyěnga ndoñe ntšobenana jamana chě Běngbe Bětsá Abrahánofraca tojánbema trato ndoñe chaondětsoservénama, ni jamana ndayá Běngbe Bětsá tojanšbuachenacá ndoñe chaondětsoservénama. <sup>18</sup> Er ndayá Běngbe Bětsá chabe entšanga tojatšatacá, tojtsemna chěnga ntšamo chě leyíñe jamama yomna ca iuayancá tmojtsamama, chca, chě tšetana soyěnga ya ndoñe nantsóbocana ndayá Běngbe Bětsá jamama tojanašebuáchenantšana. Pero ba tšabe bendicioněnga Abrahambiana jamama, Běngbe Bětsá tbojanšbuachenáyeca, Běngbe Bětsá chě soyěnga Abrahambiana tojanma.

<sup>19</sup> Asna, ¿ndayama chě Moisesbe ley nantsoservena? Běngbe Bětsá chě leyěnga tojanáboshjona, ba tšabe soyěnga jamama Abrahambioye tbojanšbuáchenantšana baytese. Běngbe Bětsá yojanjuabná chě ley chaoservé entšanga jinŷanŷiyama ndayá tšabá o ndoñe tšabá jamama bétsemnama, chě Abrahambentšana Uámana Entšá jashjanguěntscuana, ndabiama Běngbe Bětsá Abrahambioye tbojanšbuachená ba tšabe bendicioněnga jamama. Běngbe Bětsá angelěngaftaca chě ley Moisesbe cucuatšiñe tbojanántšaboshjona, y chě entšá Moisés enjamna chě oyebuambnayá Běngbe Bětsáftaca y entšángaftaca. <sup>20</sup> Uta entšata

canÿe trato jénbemamna, jtseytana inÿe entśá chë uta entśátaftaca chaóyebuambama; pero Bëngbe Bëtsá Abrahámbioye ba tśabe soyënga jamama tbojanšbuachená ora, nÿe canÿa chca tojanma, y ndoñe bonjanájaboto inÿa chabiamma Abrahánoftaca chaóyebuambama.

### *Ndayama chë ley yomna*

<sup>21</sup> ¿Chca nántsaryana, ntśamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entśangbe cucuatšiñe canÿe ley tojanáboshjona, y chë ley tojtsobena jamana entśanga ndegombre tśabe vida chamotsebomnama, as Bëngbe Bëtsá nanjama entśanga chabe bominÿiñe tśábenga chamotsemnama, ntśamo chë leyiñe jamama yomna ca iuayancá tmojtsamama.

<sup>22</sup> Pero Bëngbe Bëtsabe uabemana palabrënguiñe endayana, nÿetsca quem luarentśa entśanga cachëngbe bacna soyënga jamama juabnéngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

<sup>23</sup> Jesucristbeñe jtsošbuáchiyama entśanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntśamo entśanga Jesucristbeñe muanjobenaye jtsošbuáchiyama Bëngbe Bëtsá jinÿanÿiyama

tempo joshjanguentscuana. <sup>24</sup> Cristo jabama tempo tonjanoshjanguentscuana, chë ley bëngbiana enjamna mo canÿe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyiñe tšábenga chamotsemnama. <sup>25</sup> Pero Jesucrístbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canÿe entšacá, ndayá tšabá yomncá bënga chamotsamama cuaftsamcá. <sup>26</sup> Cristo Jesúsbeñe šmojtsošbuáchema, nÿetsca tšëngaftanga šmojobená Bëngbe Bëtsabe básenga jtsemnama, Cristo Jesúseftaca cánÿiñe mo canÿacá jtsemnëse. <sup>27</sup> Tšëngaftanga tcmónjanëbaye, y chca, Crístoftaca cánÿiñe mo canÿacá šmontsemna. Y mora šmojobená mo cach Cristcá jtsemnama. <sup>28</sup> Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nÿets tempo nÿe ínÿabiana oservénënga y chë nÿe cachëngbiana trabájayënga cachcanga, y boyabásenga y shembásengnaca. Nÿetsca tšëngaftanga mo canÿacá šmondmëna, Cristo Jesúseftaca cánÿiñe mo canÿacá jtsemnëse. <sup>29</sup> Tšëngaftanga Cristbe entšanga šmondmënayeca, šmontsemna mo Abrahábentšana entšanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjóyëngacñe.



## 4

1 Atšnaca sěntseboše jayanama, chě uaquiñá nda yochjójəngacñe ntšamo tbojtsotocancá, ntšamo chabe taitá jatšətayama tbojašbuachenacá, cha cabá mo canye basacá tojtsemnəntscuana, ndocna derecho chě soyənguiñe ntsebomnana; y chca, cha jtsemnana mo canya nyets tempo nye ínɣabiamana oservenacá, masque lempe ntšamo chabe taitá tbojašbuachenacá chě uaquiñabiamana tojtsemna. 2 Chě uaquiñá tojtsobóchantscuana, entšanga jtsemnana ndəmuanyənga ntšamo cha tbojtsajabotcá jtsoinayana, y ínɣənga jtsejuabnayana ndayá chě taitabe soyəngaca jamama, chě uaquiñá otocana soyəngaca. Y chca jtsemnana, chě taitá tojayana tempəntscuana. 3 Mo cachcá cuaftsemncá, bənga chě ndegombre soyəngama cabá ndosértaye ora, bəngnaca mandánənga monjamna mo nyets tempo nye ínɣabiamana oservenəngcá, quem luarentse imománda espíritəngaca. 4 Pero Bəngbe Bətsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entšangcá, canye shembásabəntšana tojanonyná, y yojoyena jtsaməse ntšamo judiəngbe leyine jamama ibojamna ca yojanayancá jtsaməse. 5 Quem luaroye chca tojánabo bənga jabátsebacama, y chamotsobenama Bəngbe Bətsabe basəngcá jtsemnama, bənga chě tempo šonjánamna chě ley jtsobedecənanana. 6 Y chca, tšəngaftanga ya chabe básənga šmojtsemnama jinɣanɣiyama, Bəngbe Bətsá chabe Uaquiñabe Espírítu tbojanichmó, nyetscangbe ainaniñe

cháumashënguama, y chë Espíritu endama bënga Bëngbe Bëtsá chamochembo, “Atsbe Taita ca”. <sup>7</sup> Mëntsá, cada ona tsëngaftanguentsá ya ndoñe quenátsmëna mo chë nÿets tempo nÿe ínÿabiana oservenëngcá, quem luarentse imománda espiritëngaca mandánënga, y aíñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašebuachenacá cha echanjóyëngacñe.

*Pablo, Galacia luaroquëngbiana ngménaca yojt-sanjuabnaye*

<sup>8</sup> Tempo, Bëngbe Bëtsá ndoñe šmonjanábuatma ora, tsëngaftanga šmojamna mo nÿets tempo nÿe ínÿabiana oservenëngcá, ndoñe ndegombre diosënga mondmëna espiritëngaca mandánënga. <sup>9</sup> Pero mora, Bëngbe Bëtsábioye šmontsábuatma ora, o tsábá jayanama, Bëngbe Bëtsá cmojtsëbuatma ora, ¿ntšámoyeca tsëngaftanga cachiñe chë quem luarentse imománda espiritënga šmojtsayaunana? Chënga ndocna obenana quemátsbomna, y nduámanënga mondmëna. ¿Ndáyeca tsëngaftanga šmojtseboše cachiñe jtsemnana mo chë nÿets tempo nÿe ínÿabiana oservenëngcá, chë espiritëngaca mandánënga? <sup>10</sup> Tsëngaftanga tša jtsejuabnayana diënguiñe, shinÿënguiñe, canÿe uatentša tempënguiñe y uatënguiñe, mo uámana tempëngcá Bëngbe Bëtsá tsábá jadórama, y chama bëts fiestënga jtsebomnana. <sup>11</sup> Atše corente šontsengmena, nderado atsbe trabajo tsëngaftangbeñe tondayama tonjoservé.

12 Jesucristbeyeca atšbe catsátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjobema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá.

13 Tšëngaftanga šmondétatšëmbo, atše sënjanobená chë natsana soyama tšëngaftanga chë tšabe noticiënga jábuayenama, canye šocana šonjanontšáshjango causa.

14 Atše canye šocana sënjanbomna causa, tšëngaftangbiana ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canye ángel Bëngbe Bëtsabe ichmoná šmojofjá, o cach Jesucristbioycá.

15 Ndayá chora tšëngaftangaftaca enjanopasancá, puerte oyejuayënga tcmónjánabiana. ¿Y mora ndayá tojopasá? Ndegombre, atše sëndétatšëmbo y sentsobena jayanama, tšëngaftanga ndaye sóynaca atšbiana mašmënjanmama. Chë más uámana šmojánbomna soyënga atšbe cucuatšiñe mašmënjánboshjona, y nýa mo chë bominyëgnaca masmënjánenobuchjatséca atše jatšetayama.

16 Y morna, ¿ntšamo ndegombre yomncá cbojtsëtsësnama, atšbiana šmojtsejuabná mo tšëngaftangbe uayayá cuaftsemncá ca?

17 Chë ndoñe ndegombre soyënga  
 buátëmbayënga montsinýinýná mo  
 tšëngaftangbiana ndegombre tšabá  
 chašmotsiyenama cuaftsebošcá, pero  
 chca ndoñe quenátsmëna; ndayá jamama

imojtsebošcá, tšëngaftangbiana ndoñe tšabá quenátsmëna. Chënga montseboše atšbe contra y atšbe buatëmbana soyëngama contra chašmotsemnama, chentšana tšëngaftanga chëngaftaca jtsemnama chašmotsebošama y chënga chašmotsababuánjeshanama. <sup>18</sup> Puerte tšabá endmëna atše y ínÿenga chafstseboše tšëngaftangaftaca amiguënga jtsemnama, canÿe tšabe soye jamama tojtsemnëse; y sempre chca chauëtsemna, tšabiana tojtsemnëse, y ndoñe nÿe atše chentše tšëngaftangaftaca stsemna ora. <sup>19</sup> Tšëngaftanga, chë atšbiana mo atšbe basengcá šmondmënënga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canÿe šešona jtsebomnama ora canÿe shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínÿnëntscuana. <sup>20</sup> Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiana tsësentinana. Atše tša šontsecochëngmena tšëngaftangbiana.

### *Ntšamo Agar y Sáraftaca tojanopasá*

<sup>21</sup> Canÿe soye šmochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyíñe endayancá tacmojtšësertana? <sup>22</sup> Chiñe endayana, Abraham uta uaquiñata yojánabamna ca; cánÿana Agárbeñe, canÿa chabe shembiana nÿets tempo oservená; y chë ínÿana, cachabe shémbëñe, Sara, y mua ndocnabiana nÿets tempo oservená yonjamna.

<sup>23</sup> Chë chabe shembaliama nyets tempo oservenabe šešona, tojanonýná nye Abraham y Agar chca chaotsemnama tbojánbošenayeca; y cachabe shembe šešona tojanonýná, Bëngbe Bëtsá chë soye jamama Abrahámbioye tbojánšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bënga canýe uámana soye šontsabuatambá. Ndayá chë uta shembásataftaca tojanopasacá, uta trato entsinýinýná: chë shembása Agar, chë nyets tempo nye ínýabiama oservená yojamná, entsinýinýná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatšiñe tojanáboshjona ora. Agar básenga yojtsabamna ora, chëngnaca tmojanonýná nye ínýabiama nyets tempo oservénënga jtsemnama, y chë tratentša leyiñe soyëngaca mandánënga jtsemnama tmojtsebošëngnaca jtsemnana mo nye ínýabiama nyets tempo oservénëngcá.

<sup>25</sup> Ndayá Agáraftaca tojanopasacá entsinýinýná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénënaca entsinýinýná, er chentša entsanga montsemna chë leyëngaca mandánënga. Ntšamo Agar y chabe básenga nye ínýabiama nyets tempo oservénënga monjamncá, Jerusalemëntša entsángnaca cachcá chëngcá mondmëna, chë leyëngaca nyets tempo mandánënga bëtsemnayeca.

<sup>26</sup> Ndayá Sáraftaca tojanopasacá, chë nye cachabiama trabájaye shembása, entsinýinýná chë trato, chë tšabe bendicionënga Abrahambiama jamama chábioye tbojánšbuachená ora. Chánaca entsinýinýná chë

Bëngbe Bëtsabe bëts pueblo celoca, Jerusalén ca uabaina pueblo, er chë chentse mochjoyénananga, mora ndoñe quemuátiyena chë leyéngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entšanga. <sup>27</sup> Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiamá, y chca endmëna mo canye shembása šešonga ndabamná y aíñe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiamá, y chca endmëna mo canye shembása aíñe boyaftaquécá, er Bëngbe Bëtsabe uabemana palabrenguiñe chë shembásatbiamá mëntšá endayana:

Shembása šešonga ndabamná, y ndocna  
te tsetšanënga ndbomná šešona  
jtsebomnama,

moyejuá y moyó oyejuayá cojtsemnama.

Chca moma, er aca, chë shembása chabe boyabi-  
ama utšená, chë shembása boyá bomnabi-  
ama más básenga cochántsabamna ca.

<sup>28</sup> Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbyoye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. <sup>29</sup> Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nýe chata chca tbojánbošenayeca

onŷnaná; Isaac, chë Bëngbe Bëtsabe Espíritbeyeca onŷnaná), mórnaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. <sup>30</sup> Pero, ¿ndayá Bëngbe Bëtsabe uabemana palabrënguiñe Abrahambe básatbiana iuayana? Mëntšá endayana: “Moma, chë nŷets tempo nŷe ínŷabiana oservená y chabe basa acbe yebnentšana chábuaisebocnama, er chë nŷets tempo nŷe ínŷabiana oservenabe šešona ndoñe quenátobena chabe taitabe soyënga jtsebomnama. Nŷe chë propio shembe šešona aíñe, er chë shemna ndoñe nŷe ínŷabiana nŷets tempo oservená quenátsmëna.” <sup>31</sup> Chcasna, Jesucrístbeyeca atšbe catšátanga, bënga ndoñe quemuátsmëna mo canŷa nŷe ínŷabiana nŷets tempo oservenabe básenga cuaftsemncá, er mora ya ndoñe más quemuátsmëna chë léyeca nŷets tempo mandánënga. Y aíñe montsemna mo canŷe shema ndoñe nŷe ínŷabiana nŷets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

### *Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nŷets tempo nŷe ínŷabiana oservenëngcá chamondëtsiyenama, chë léyeca mandánënga. Nŷa šmochtsentšena nŷets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínŷyenga chácmabiamama.

<sup>2</sup> Tšabá šmochjouena. Atše Pablo cběyana: Nderado tšëngaftanga ndoñe judiënga, šmojalesenciá ínÿenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiamá tojanmcá tondayama nantsošervená. <sup>3</sup> Ndëmuanÿe entšánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nÿetsca chë judiëngbe leyentša mandënga jtsobedecénana. <sup>4</sup> Ndëmuanÿenga tšëngaftangbentšana šmojtsenguá, Bëngbe Bëtsabe bominÿiñe tšábenga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crísoftaca cánÿiñe mo canÿacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiamá jtsejuabnayëse, chácmatsebacana. <sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominÿiñe tšábenga nÿets tempo chamotsemnama. Y bënga chca mondobátmana, Jesucrístbeñe ošbuáchiyana bómnyeca, y chë ošbuáchiyana chë Uámana Espíritbiajana bëngbioye endobá. <sup>6</sup> Er Crísoftaca cánÿiñe mo canÿacá tmojtsemna ora, aíñe base bobachtema tëtšenënga tmojtsemna o ndoñe, tondaye ntšámanana; ndayá puerte enduámana endmëna chë Jesucrístbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.



<sup>7</sup> Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama? <sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnana. <sup>9</sup> Ntšamo entšanga mondëntšayancá: “Nýe base levadura jamana nýetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnana šmojabojátšese, šmuatjábocna nýetsca leyëngaca mandánënga. <sup>10</sup> Bënga Bëngbe Utabnáftaca cánýiñe mo canýacá bétsemnayeca, atše corente séntsetatsëmbo, ntšamo atšbe juabna yomncá tšëngaftángnaca cachcá šmochtsejuabnayama; y átšnaca corente séntsetatsëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiana chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnana entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjósentiaye. <sup>12</sup> Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

<sup>13</sup> Pero tšëngaftanga, Jesucristbeyeca atšbe

catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bétsemnama, mora ndoñe šmatjátsjuabnaye šmojtsobena jalesénciana, nÿe tšëngaftangbe cuerpënga tšabá chamotsemnama juabnëngaca mandánënga jatiyenama. Chamna, tšëngaftanga šmuenbobonshánayeca, nÿetscanga šmochtsenájabuachana. <sup>14</sup> Er ntšamo Moisesbe leyentša nÿetsca mandënguiñe endayancá, nÿe canÿe mandiñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ínÿenga chamot-sesufrínama jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsebonna. Ndóñese, nÿetscanga šmatjánenpochocaye.

### *Ntšamo chë Bëngbe Bëtsabe Espíritbeyeca vida jtse-bomnama*

<sup>16</sup> Chíyeca cbochjáuyana: Nÿets tempo šmochtsiyena ntšamo chë Uámana Espíritu cmojtsamëndacá, y chca, tšëngaftanga ndoñe quešmochátama soyënga, nÿe cach tšëngaftanga tšabá jtsomñama juabnëngaca. <sup>17</sup> Er ndayá bënga, nÿe entšangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nÿe entšangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojtsamëse, ndoñe quešmátobena jamana, ndayá

cach tšëngaftanga, nÿe entšangbe juábnaca jamama šmojatsboščá. <sup>18</sup> Tšëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyiñe iuayancá játamama.

<sup>19</sup> Ntšamo entšanga, nÿe entšangbe juábnaca tmojtsamcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jësejuabnayana, y ndoñe ntsobenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nÿetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nÿe rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnama jtsamana. <sup>21</sup> Nÿe jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espíritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjëmbana ínÿengaftaca jtсийenana, puerta uantado nÿetsca padecéniñe jtsemnana, nÿetscanga corente bonshanánaca jtsënÿayana, tšabe ainana jtsebomnana, y nÿétscañe tšabe palabra bomnënga

jtsemnana, <sup>23</sup> jtsejuabnayana chë ínÿenga mo chabiana más uámanënga cuaftsemncá, y cachá nÿetsca soyënguiñe jenomándama jtsobenana. Y ndocna ley quenátsmëna, chca soyënga tmojtsama entšangbiana contra cháuyanama. <sup>24</sup> Jesucrístbenga imomnënga tmojama, chënga chë nÿe entšangbe juabnëngaca mandánënga ndoñe ntsemnana; ya ndoñe más, chë nÿe cachënga tšabá jtsomñama bacna juabnëngaca mandánënga quemátsmëna, y chë nÿe cachëngbiana soyënga jamama bëtscá juabnëngaca cach ndoñe. <sup>25</sup> Bënga ndegombre tšabe vida chamotsebomnama Uámana Espíritu yojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá. <sup>26</sup> Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiayama, y ndoñe nÿe mochjatsboše ntšamo inÿa tojatashjachá jatsbomnama.

## 6

### *Nÿetscanga šmochtsenájabuachana*

<sup>1</sup> Jesucrístbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonÿayëse. Cuedado šmochtsebomna, er ndoñese, tšëngaftánagnaca cmatjócochëngo

cachcá soye jamama. <sup>2</sup> Chë soyënguifne chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canye uámana entšá yomna ca, pero ndoñe chca cha tondmënëse, cachá jtsenoíngñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nÿetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntsayancá: “Ndayá tcojajé y cachcá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nÿe cachá tšabá jtsomñama bacna juabnëngaca, cha echanjábocna jabuache castiganá nÿetsca tescoma. Pero mo nda uaba fshantsiñe tojajecá, tšabe shajuana josháchiñana, cachcá

nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna. <sup>9</sup> Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canye bëts te echanjóshjango, bënga bëtská tšabe soyënga josháchiñama, mo tša tšabe shajuanënga tmojashaquëcá. <sup>10</sup> Chíyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnyayeca, bëngcá Bëngbe Bëtsabe básenga imomnëngbiana.

*Quem tsbuanácha juapochócama cach Pablo tojanábema*

<sup>11</sup> ¡šmochjinýe, tša bëts letrëngaca cach atšbe cucuátšeca mora cbontsëbuabiamná!

<sup>12</sup> Ndëmuanýënga imojtseboše, tšëngaftanga chë ndoñe judiënga jamëndama tšëngaftangbe más delicadentse base bobachtema tëtšenënga chašmotsemnama, ntšamo judiënga monduamancá, chënga chca jtsamana nýe chë judiëngaftaca tšabá joquédama. Y chca jtsamëndayana, chënga chamosufrima ínýënga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiynase. <sup>13</sup> Pero ni mo chë más delicadentse base bobachtema tëtšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tëtšenënga chašmotsemna, chënga jtsenábotamnyama jobenayama, ínýënga

base bobachtema chacmatëtšama tšëngaftanga šmojalesenciama. <sup>14</sup> Atšeftacna ndocna te chca chaondopasá. Atše nÿets tempo y becá chanjëftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámama ntšamo entšanga quem luarentše imojuabnacá y chëngbiana puerta iuámama; y ndayá atšbiana puerta iuámama, entšangbiana tondaye quenatámama; y chë causa, atše chëngbiana mo obanacá sëndmëna. <sup>15</sup> Chë más delicadentše base bobachtema aíñe tëtšená o ndoñe, tondaye quenatámama. Ndayá puerta iuámama endmëna, Bëngbe Bëtsá mo tsmëma entšangcá bënga šojábiana, Uámana Espiritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebonnama y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entšanga imomnëngbiámnaca.

<sup>17</sup> Y mora, nÿe canÿe soye cbochjáuyana: morscana ndocná chaondëtsama atše jasúfriama chašotsemnama; er atšbe cuerpiñe endëtinÿna ntšamo atše tijasufrí, Jesusbe oservená bëtsemnama.

<sup>18</sup> Jesucristbeyeca atšbe catšátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

## **Bëngbe Bëtsa Cabëngaftaca Entsoyebuambna New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



PDF generated using Haiola and XeLaTeX on 21 Feb 2024 from source files  
dated 29 Jan 2022  
19104c0e-9046-5ff3-82fb-eb838c88dcf9